

Vibracionnan di SMOVEY ta yuda pacientnan di Parkinson mehora masha hopi mes



ORANJESTAD(AAN): Organizacion Parkinson Aruba(OPA) y Fundacion Movimiento Ta Bida (FMTB) dentro di poco ta bin cu un programa piloto yama SMOVEY.

E programa aki ta pa yuda pacientnan di Parkinson mehora nan estado fisico. Manera ta conoci, ora un persona haya Parkinson su funcionnan 'Motorico' ta bira menos.

Pues e persona su movimientonan ta bira mas poco poco y e por sufrí di temblamento.

SMOVEY ta algo cu a wordo inventa pa yuda e hendenan cu e problema aki.

Terapeuta fisico Joke Schmid kende ta bay yuda e pacientnan, a splica cu el a traha 20 aña na Austria den rehabilitacion di pacient.

Dos aña pasa ora cu el a bishita su coleganan di rehabilitacion na Vienna, el a wak un grupo di terapeuta fisico traha cu un grupo di pacient di Parkinson.

E resultadonan di terapia tabata espectacular y pesey sra Schmid a tuma contacto cu e hendenan cu a traha cu SMOVEY pa yuda e pacientnan aki.

SMOVEY ta un aparato cu tin 4 bala paden cu ta move y ta vibra.

E pacient ora cu e uza e aparato, tin cu teen e aparato na e parti preto, door di cual e pacient ta sinti e vibracionnan, cu ta stimula e sistema nervioso.

Sra Schmid a splica cu Parkinson ta un enfermedad Neurologico y ora un persona wordo diagnostica cu

Parkinson, e specialistanan ta bisa e pacientnan pa nan keda move, pero esaki no ta facil.

"Bo mester sa kico bo mester move", segun sra Schmid.

Mayoria pacient di Parkinson ta perde nan habilidad di move normal, nan ta bira stijf y tin ocasionnan unda cu nan ta tembla.

E SMOVEY tin 4 bala di hero cu ta move y causa vibracion ora cu e pacient pa zwaai of move e obheto.

E vibracionnan ta stimula e sistema nervioso y despues di tempo, pacientnan ta conoce un adelanto hopi grandi.

Tin varios pacient na Austria por ehempel cu a stop di tembla y ta move cerca di normal.

Un persona cu tin Parkinson ta hasi movimientonan cortico door di e enfermedad cu hopi ta haya door di un falta di Dopamina.

Durante e terapia e pacientnan ta wordo guia pa nan hasi movimientonan mas largo di bay dilanti y di bay patras.

Sra Schmid a splica cu despues di 10 siman di terapia, e pacientnan na Austria a keda cu e habilidad di hasi movecion largo, nan a bira menos stijf y e temblamento tambe a bira hopi menos.

E number di SMOVEY ta bin di "Smile And Move". Ora cu sra Schmid a wordo puntra si otro pacientnan por uza SMOVEY y el a bisa si.

Por ehempel tin hendenan cu ta bin bek despues di a haya un stroke, tambe por uza e aparato.

